



## UMS lakar sejarah miliki hospital sendiri

Berita Harian, 28 Februari 2018, Rabu

Oleh Mohd Izham Unnip Abdullah, thadius@nstp.com.my

KOTA KINABALU: Selepas kira-kira 23 tahun diwujudkan, Universiti Malaysia Sabah (UMS) bakal melakar satu lagi sejarah apabila impian untuk memiliki sebuah hospital sendiri bakal menjadi kenyataan.

Pelancaran bagi pembinaan hospital itu di kampus induk universiti berkenaan, di sini, dijadual disempurnakan Perdana Menteri, Datuk Seri Najib Razak, sempena lawatan beliau ke Sabah, lusa.

Naib Canselor UMS, Prof Datuk Dr D Kamaruddin D Mudin, berkata hospital itu yang akan dikenali sebagai Smart HUMS dibangunkan sejajar Transformasi Ke Arah Universiti dan Industri 4.0 yang turut merangkumi transformasi digital atau Smart Eco-UMS 4.0.

Katanya, apabila siap, ia adalah sebuah hospital yang canggih dan dilengkapi kemudahan digital sejajar era digital masa kini.

"Kemudahan ini bakal menjadikan UMS tumpuan komuniti tempatan dan masyarakat antarabangsa.

"Pembinaannya dijangka mengambil masa kira-kira tiga tahun iaitu dijadualkan siap pada tahun 2021 dengan kapasiti 400 katil," katanya kepada NSTP, di sini, hari ini.

Dr D Kamaruddin berkata, hospital itu bakal dilengkapi teknologi terkini berkaitan penjagaan kesihatan selain pengajaran, pembelajaran dan penyelidikan dalam bidang perubatan dan yang berkaitan.

Katanya, selain untuk tujuan pengajaran, pembelajaran dan penyelidikan, Smart HUMS akan menyediakan perkhidmatan penjagaan kesihatan kepada masyarakat di Sabah dan kawasan lain dari seluruh negara.

"Ia juga bakal mewujudkan peluang pekerjaan kepada penduduk tempatan. Secara ringkasnya, penubuhan Smart HUMS menjadi pemangkin perubahan dalam bidang penjagaan kesihatan dan latihan perubatan di rantau ini," katanya.

UMS adalah antara universiti awam (UA) yang menawarkan kursus dalam bidang perubatan menerusi Fakulti Perubatan dan Sains Kesihatan yang diwujudkan lebih 10 tahun lalu di kampus induk universiti itu.

Perdana Menteri dijadual menyempurnakan pembinaan hospital itu pada Majlis Pelancaran Projek Pembangunan Hospital Pengajar UMS di kampus induk universiti berkenaan, di sini, pada jam 10 pagi lusa.

Selepas majlis itu, Perdana Menteri dijadual bersama-sama pelajar dan kakitangan UMS menunaikan Solat Jumaat di Masjid UMS.

Sebelum itu, Perdana Menteri turut dijadual melakukan tinjauan mesra di bangunan baharu Sekolah Kebangsaan (SK) dan Sekolah Menengah

Kebangsaan (SMK) Pekan Telipok, di Taman Perindustrian Kota Kinabalu, Sepanggar.

Pada sebelah petang, Najib dijadual hadir Perhimpunan Perdana Bersama Penjawat Awam Negeri dan Persekutuan di Auditorium Pusat Pentadbiran Negeri Sabah (PPNS), di sini.

Program Perdana Menteri lusa diakhiri dengan Majlis Makan Malam Bersama Persatuan Suku Kaum dan Kebudayaan Negeri Sabah di Hotel Magellan, Sutera di sini.